



## **AZIMIO NA 1/ 2015**

### **AZIMIO LA BUNGE LA JAMHURI YA MUUNGANO WA TANZANIA LA KURIDHIA MKATABA WA MISINGI NA KANUNI ZA UTUMISHI WA UMMA NA UTAWALA BARANI AFRIKA LA MWAKA 2011 (THE AFRICAN CHARTER ON VALUES AND PRINCIPLES OF PUBLIC SERVICE AND ADMINISTRATION, 2015)**

---

**KWA KUWA**, Jamhuri ya Muungano wa Tanzania ni Nchi Mwanachama wa Nchi za Umoja wa Afrika (AU);

**NA KWA KUWA**, Wakuu wa Nchi Wanachama wa Umoja wa Afrika, katika Mkutano wa 16 uliofanyika Adis Ababa, Ethiopia, tarehe 31 Januari, 2011 waliazimia kila Nchi Mwanachama kuridhia Mkataba wa Misingi na Kanuni za Utumishi wa Umma na Utawala Barani Afrika ili kuwezesha Mkataba huu kutekelezwa;

**NA KWA KUWA**, Nchi Wanachama zinatambua kuwa Mkataba wa Misingi na Kanuni za Utumishi wa Umma na Utawala Barani Afrika ni nyenzo muhimu katika kujenga Utumishi wa Umma wa Kiasa, wenye uadilifu na weledi utakaowezesha Bara la Afrika kukabiliana na changamoto mbalimbali zikiwemo za kiuchumi, kisiasa na kijamii;

**NA KWA KUWA**, Mkataba wa Misingi na Kanuni za Utumishi wa Umma na Utawala Barani Afrika, pamoja na mambo mengine unalenga katika yafuatayo:

- (i) Kuimarisha misingi na Kanuni za Utumishi wa Umma zilizomo ndani ya Mkataba;

- (ii) Kuhakikisha kuwa huduma zinazotolewa na Utumishi wa Umma ni za ubora na ubunifu kulingana na mahitaji ya Wananchi;
- (iii) Kuhamasisha jitihada za Nchi Wanachama kuubadilisha Utumishi wa Umma kuwa wa kisasa na kuimarisha uwezo wa kutoa huduma kwa Wananchi;
- (iv) Kuhamasisha Wananchi kushiriki katika usimamizi wa Utumishi wa Umma;
- (v) Kuimarisha misingi ya uadilifu katika kuendesha shughuli za Utumishi wa Umma na Taasisi zake ili kuwa na uwazi katika kutoa huduma kwa Wananchi;
- (vi) Kuboresha mazingira ya utendaji kazi katika Utumishi wa Umma na Taasisi zake ili kuhakikisha haki za watumishi wa Umma zinalindwa;
- (vii) Kuwianisha Sera, Kanuni na Taratibu zinazotawala Utumishi wa Umma miongoni mwa Nchi Wanachama kwa lengo la kuwa na mtangamano wa Kikanda na Kibara;
- (viii) Kuongeza usawa kati ya wanawake na wanaume na baina ya Taasisi za Umma;
- (ix) Kuimarisha ushirikiano baina ya Nchi Wanachama, Jumuiya za Kiuchumi za Kikanda na Jamii ya Kimataifa kwa nia ya kuboresha Utumishi wa Umma; na
- (x) Kubadilishana uzoefu na utaalamu baina ya Nchi wanachama na kuweka kanzidata (*Database*) ya taarifa hiyo miongoni mwa Nchi Wanachama;

**NA KWA KUWA**, kuridhiwa kwa Mkataba wa Misingi na Kanuni za Utumishi wa Umma na Utawala Barani Afrika ni fursa ya Tanzania kuwa:-

- (i) Kuweka viwango katika kuendesha Utumishi wa Umma na kujipima kwa kuangalia wenzetu wanachokifanya katika kuboresha Utumishi wa Umma;

- (ii) Kupata misaada ya kimaendeleo kutoka Washirika wa maendeleo ambao watafadhili miradi itakayotokana na utekelezaji wa Mkataba huu;
- (iii) Kupata tuzo za ubunifu katika utumishi wa umma zitakazokuwa zinatolewa kutokana na masuala mengi yaliyopo katika Mkataba na tayari nchi yetu inayatekeleza masuala hayo kupitia sera, kanuni na taratibu mbalimbali za Utumishi wa Umma hapa Nchini;
- (iv) Kujenga uwezo wa Utumishi wa Umma na Taasisi zake, kupambana na changamoto mbalimbali za ukuaji wa mahitaji ya huduma za jamii zikiwemo umaskini, majanga asilia kama vile njaa na ukame, uharibifu wa mazingira, ukiukwaji wa haki za binadamu na rushwa;
- (v) Kuimarisha Utumishi wa Umma katika nchi yetu kwa kuongeza ujuzi, maarifa, ubunifu, tija, ufanisi, na uwezo wa utendaji kazi;

**NA KWA KUWA**, uchambuzi wa kina uliofanyika umebaini kuwa Mkataba wa Misingi na Kanuni za Utumishi wa Umma na Utawala Barani Afrika haukinzani na sheria, kanuni na taratibu zinazotawala Utumishi wa Umma katika Jamhuri ya Muungano wa Tanzania;

**HIVYO BASI**, kwa kuzingatia umuhimu wa Mkataba wa Misingi na Kanuni za Utumishi wa Umma na Utawala Barani Afrika na manufaa ambayo Jamhuri ya Muungano wa Tanzania itapata, na kwa mujibu wa masharti ya Ibara ya 63(3)(e) ya Katiba ya Jamhuri ya Muungano wa Tanzania ya Mwaka 1977, Bunge sasa linaazimia kuridhia Mkataba wa Misingi na Kanuni za Utumishi wa Umma na Utawala Barani Afrika, yaani "*The African Charter on Values and Principles of Public Service and Administration*".

**Limepitishwa na Bunge leo tarehe 25 Machi, 2015**

Dkt. Thomas D. Kasilillah  
**KATIBU WA BUNGE**